

22/08/2000

Penuntut kesal pensyarah gemar kritik kerajaan

Mahasiswa

SAYA dapati kebanyakan pensyarah di Akademi Pengajian Islam Universiti Malaya (APIUM) lebih gemar mengkritik kerajaan dan kurang menumpukan perhatian kepada mengajar. Pendek kata hampir 75 peratus masa di bilik kuliah dihabiskan dengan bercakap soal politik yang berunsur hasutan. Berikut adalah realiti yang berlaku di universiti berkenaan.

Hampir semua pensyarah berani menghina Perdana Menteri, Datuk Seri Dr Mahathir Mohamad ketika kuliah dan aktiviti kokurikulum. Mereka memperalatkan pusat ilmu sebagai topeng untuk menutup kegiatan mereka dalam arena politik.

Contohnya, mereka menggunakan Masjid Kampung Laut sebagai pentas ceramah politik dan bukannya berusaha menunjukkan fungsi masjid sebagai pusat penyebaran dakwah dan ibadat.

Tidak kurang juga mahasiswa yang berani bertindak ekstrim dengan menampal poster tokoh-tokoh politik pembangkang di bilik asrama dan meja belajar.

Mereka terlalu fanatik dan taksud dengan tokoh politik berkenaan. Malah hampir 60 peratus mahasiswa kemasukan 12 Jun lalu memakai kopiah PAS (hijau putih) untuk solat dengan alasan ia lebih afdal daripada kopiah putih yang tidak bercorak.

Hal yang demikian disebabkan oleh kesan negatif pengaruh parti pembangkang ke atas mahasiswa terbabit. Pemikiran dan idea mahasiswa disekat dan dicorak supaya membenci dan menolak kerajaan yang sedia ada.

Aktiviti dan program yang dianjurkan oleh pihak akademi atau Biro Akademik lebih menjurus kepada mencabar kewibawaan kerajaan dan tidak berbentuk tarbiah.

Contohnya majlis usrah dan ta'lim yang sepatutnya menjadi tempat bermuzakarah dijadikan tempat mencerca dan merendah-rendahkan kemampuan serta kredibiliti kerajaan.

Saya khuatir sekiranya perkara ini berlanjutan, ia akan meracun pemikiran mahasiswa yang bakal menerajui negara pada masa depan dan boleh menyebabkan pertelingkahan, permusuhan dan perpecahan di kalangan masyarakat Melayu.

Pensyarah dan juga mahasiswa sendiri sering menyalahkan kerajaan atas alasan berlakunya banyak kesalahan dan kepincangan dalam pentadbiran pendidikan melalui kenyataan tertentu seperti kerajaan tidak suka anak-anak Melayu melanjutkan pelajaran ke Institut Pengajian Tinggi (IPT) dengan melakukan serangan tersembunyi.

Seperti kata salah seorang pensyarah yang mempersoalkan kenaikan yuran pengajian APIUM daripada lebih RM300 kepada lebih RM900 sekarang (per semester).

Contoh kedua ialah kerajaan tidak mahu menyediakan infrastruktur yang lengkap dan ini dapat dilihat di APIUM Nilam Puri melalui kesukaran mendapatkan bekalan air bersih.

Mereka mendakwa kerajaan menganaktirikan Akademi Pengajian Islam kerana tidak suka kepada kebangkitan ulama profesional.

Akhir kata, saya berharap pihak kementerian memandang serius hal ini dan mengambil langkah sewajarnya untuk menangani isu pencampuradukkan politik dan pengajian yang masih berlaku.